

EUPM će moći preporučiti otpuštanje i smjenjivanje policajaca

Visoki predstavnik, Paddy Ashdown je sa policijskim komesarom Sven Fredriksonom postigao dogovor o mehanizmu koji će omogućiti Evropskoj policijskoj misiji u BiH (EUPM) da daje preporuke za otpuštanje policajaca, smjenjivanje policijskih zvaničnika i njihovih pretpostavljenih za koje se utvrdi da su se ponašali u suprotnosti s Dejtonskim mirovnim sporazumom. Visoki predstavnik je krajem prošle sedmice o ovoj odluci obavijestio predsjednike, premijere i predsjedavajuće Parlamentarnih skupština na državnom i entitetskom nivou.

Vlada BiH je na sastanku sa Upravnim odborom Vijeća za implementaciju mira održanom u Sarajevu 23. septembra prošle godine obećalo da će podržati prijedlog o otpuštanju svakog policajaca koji ne bude ispunjavao moralne standarde i standarde kompetentnosti za obavljanje posla koji su definirani Dejtonskim mirovnim sporazumom. Ovo obećanje predstavlja značajnu podršku EUPM-u u ostvarivanju dva strateška cilja njihove misije, a to su pomaganje policijskim snagama da osiguraju bezbjednost povratnika i rješavanje slučajeva organiziranog kriminala i trgovine ljudima.

Prilikom donošenja ove odluke, Visoki predstavnik je rekao: "Posebno sam svjestan potrebe za razvijanjem i promoviranjem potencijala lokalnih policijskih organa BiH da preuzmu potpunu odgovornost za disciplinske i druge procese koji uključuju otpuštanje policajaca. Mojom odlukom se iz tog razloga omogućava otpuštanje policajaca, što će predstavljati konačnu mjeru, ukoliko komesar EUPM utvrdi da nije poduzet odgovarajući interni disciplinski postupak, ukoliko je došlo do opstrukcija tog postupka ili ukoliko postupak nije pravičan". Prema ovoj odluci, osobe koje su nadležne da

osiguraju potpunu i pravičnu istragu i disciplinski postupak, a to ne učine, takođe mogu biti smijenjene s funkcije na zahtjev komesara EUPM.